

esgitpog paseg na tóg gitjga angapteg otoigatigen, ap sepangatatóg, aptj gteg angapteg, gato na elmigisgeg gagi nolmi gtjitjital; na amsgoes tjinem teli glosisóg etli osgitjinoit lno menigog epegoitga. Nin S. L. S.

PAGEOIMGEOEI (Siaoi eloigasig)

Na pa teli nsetemegsep temg ltlaneoei tpeletagan; pigoelgig eta gtjipatlíasg tllisip teplotegesenisg elogeneg tesiponatj mitjoatjitj piltoi gemnieoitj; tóg sapeoitag Tomaóg notji gtjitjitegeoinoag teli oigiges otoigatigenigtog: Gitjga pógóti nsetoeg mitjoatjitj, ogtjiatj ontaoitemen ag gsatemen ola gtjialasotmagan, na tllisip tepótj. Gtegig notji gtjitjitegeoinog oitjei teli ginamoatitjig; Maoi tllitetemeg tan tesititj nestoóltitjig, tan pa teli notgoóltitjig, gisi ignemotjig petjili aptjitimgeoei, tlia menag oatjoitetemog tan telategetj. Tan teli nsetoitasit mitjoatjitj teli melgi tpeletag Gisolgol, tjel Santeoi Maoiomi mo pa gisi ogtji menalagol. Tan totjio mitjoatjitj netaloeoit, nangemio telgitasit opagapogoen ag oitjei ogemnieoin. Na ogtjit santeoi Maoiomi tllentigtog teli tpeletages: Mitjoatjitj esgemenag nestoitasioag mógoe talenog, tlia mógoe gemnieoioag: eln ógotj menag netaóplategeog, mógoe gisi entog tan teli onitjanit-elementjel Gisolgol. Elpa na oitjei papeoagigeoei maoi tpeletagemgeoei, gotjinoag Penoe XIII papeoiteg, teloeg: Elpatotjítjig ag epitetjítjig nsetoegig, tan totjio tetotjegig ogtistotetemenego na gtjialasotmagani mitjioitjeoei, Oestaolgel ogtinin, ag piloei ogsitgamogoeoei pipnagan, tóg neta msenemititj getlamsetoag-anigtog ag gesaltimgeoiegtog. Net ogtetjig teli oigasig patliaseoei sigentatimgeoeigtog: Talsip msenteo mitjoatjitj petjili aptjitimgeoei? Maoen aptj tli oli gtjitjítjig ag onigo ag patlias pagapogateget; negemóo pipanigemati, — ogtji gtjijitoata gitjga sig onenemelin ag ogtemitetemelin na pagalaptemeg gtjialasotmagan.

Mset oegela tesigel eoiwasigel tóg gisi ogtjatasig, ogtetotjein mitjoatjitj omsenemen gemnieoti tan tot-

jio istoitetg sapeoig na pipnagan ag agsitgamogoeoei mitjioitjeoei, ag netaoi tógog getlamsetoagani gsaltimgeoeigtog; mo pa peoatasitnog ogagi nenemen tan alasotmaganigtog tlei; teptag nat gógoei onenemen; ag mógoe peoatasitnog ootatjoi nsetoitasin, pasig eta opógóti nsetoitasin. Na ogtjit mogoe oelianog atjatasitten piltoi gemnieoti misógome atji nsetoieimg. Gis gagaisg gotjino papeoit teli ginamoeg; getj eta Pióg IX melgimaseniga gtjipatlíasga oenotjga ogtjit lnim pógóti nagatasigsep piltoi gemnieoti. Oitjei papeoagig ilatasigsep tpeletagan loanigtog tlei, tan teloemges, ma gemnieoioag mitjoatjitj misógome tllasiponatj tjel tapo. Ag na getjigao pipanigesimges, etog mitjoatjitj gisi gemnieoit tllasiponatj tjel tapo gisna neo, teli asiteoigasigsep: Elpatotjítjig ag epitetjítjig natji gemnieoktititj tan totjio tetotjegig onsetoóltineo, netna tan tllisip nestoit-asoltitjig.

Na tóg gtjipatlíasg papeoagig tanig notjotemitiitj tan tlei gtjialasotmaganigtog, maotatiteg setaneomgeoei tepgenoset 15 tes. 1910, getoi gagi menatotitj tan telamogol óplitasimgoel ag mili nagatimgoel, golaman mitjoatjitjig otjóoita-tag Oestaolgoigtog notgoóltititj, otapesoltitag tan sapeoi mimatjilítjel ag tjtongotal eloeotiei nsanógónigtog, na teli tpeletagatisenisg ogtjit mitjoatjitjeoei piltoi gemnieoti mset tami oli ogsótemen.

Temg eta tan tetotjeimg otjit gemnieoti, istege pa otjit pagapogóti na pa tan totjio mitjoatjitj pógóti nsetoeg, netna gigtjio elogeneg tesiponatj, tlia me gitjga atjiponatja tjel me notgoega. Na tllisip pógtamgiag tan telgitasoltitjig gitg opagapogoaíneo ag ogemnieoítineo.

Tapoóoei, ogtjit amsgoes opagapogoen gisna opiltoi gemnieoin, mógoe menoegog ogagi nenemen tan alasotmaganigtog tlei. Eln tepetog amotj siaoi ginamasiteo tan tetotjegig sigentatimgeoei gesg pemi atji nsetoitasit.

Sisteoei tan telgitasit onenemen getoi piltoi ilatasit, netna gionagatjeoel mesgigel ogsetógóni getleoel, tóg o tllisip istoitetemen gemnieotiei pipnagan ag ogsitgamogoeoei mitji-